



Cantun Grischun

Cumegn Savognin

**Agiunta alla lescha da biagier
davart la practica da concessiun
per indrezs solars**

Sa basond agl art. 58 dalla lescha da biagier relascha la suprastanza communal la suandonta agiunta alla lescha da biagier davart la practica da concessiuns per indrezs solars:

Camp da validitad e scopo


Igls prancepis dall'agiunta preschentada valan per tot igls novs projects d'installar indrezs solars segl territori digl cumegn da Savognin. Els permettan ena basa da valetaziun unifi-tegeida per la concessiun d'indrezs solars.

Manual per indrezs solars, Uffezi digl svilup territorial GR

Las explicaziuns aint igl manual cantunal per indrezs solars (stadi zarcladour 2014) davart igl proceder e las recumondaziuns da furmaziun valan supplementarmaintg all'agiunta pre-schainta.

Noziuns

I vign distinguia tranter collectours solars per ava tgoda/scoldamaint ed indrezs fotovoltaics per la producziun d'electricitad. La noziun collectiva cumpeglia schibagn collectours solars scu er indrezs fotovoltaics.



Indrezs solars tgi dovran nigra lubientscha

Indrezs solars adatts suffiziantamaintg sen tetgs ainten las zonas da biagier ed agricolas dovran nigra lubientscha da biagier (art. 18a LPS/RPG). Indrezs solars valan per adatts suffiziantamaintg schi els (sa basond agl art. 32a OPT/RPV):

- a. surpassan la surfatscha digl tetg an en dretganhel per maximum 20 cm (misiro davent dalla cuvreida digl tetg);
- b. passan betg sur la surfatscha digl tetg or sch'ins varda da davant e da surangiu;
- c. vignan exequias tenor igl stadi dalla tecnica cun paca reflexiun; e
- d. furman ena surfatscha coerenta e cumpacta.

Tals projects per indrezs solars on da neir annunztgias an scretg all'istanza da biagier avant la projectaziun ed execuziun (formular d'annunztga digl Uffezi digl svilup territorial GR, cf. manual).

L'istanza da biagier decida, schi las premissas per en project tgi dovra nigra concessiun èn dadas e communitgescha la sia decisiun agl patrung da construcziun an terma da 15 deis da labour.

Indrezs solars ainten zonas da protecziun e bietgs protegeas

Per l'installaziun d'indrezs solars ainten la zona da vischnanca, la zona da mantignamaint scu er ve da bietgs schurmageas tenor igl plan general da furmaziun dovrigl ena lubientscha. Per tals indrezs valan las cundiziuns per indrezs solars adattos suffiziantamaintg (art. 32a OPT/RPV) scu er las suandontas premissas:

- a. igls indrezs solars on da furmar ena part integrala d'en concept d'energeia per igl antier bagn immobigliar. Aint igl rom digl concept d'energeia ò la realisaziun digls indrezs solars da neir explitgeida e mutivada (cumprova digls basigns). Igl concept d'energeia ò da neir aggiunto alla dumonda.
- b. igls indrezs solars dastgan curveir maximum igl agen basigns cumpruvo.
- c. igl plazzamaint digls indrezs solars duess succeder tant scu pussebel sen bietgs pitschens u annexs u an sagonda prioritad betg dalla vart dalla veia digl bietg principal.
- d. tar bietgs principals ainten la zona da vischnanca e tar bietgs protegeas on igls indrezs solars da neir restranschias sen 20% dall'ala digl tetg necessaria, ainten la zona da mantignamaint sen 1 m² per bietg (tenor art. 31 al. 4 LPT/KRG).
- e. Ainfra la zona da vischnanca e ve da bietgs protegeas è ena montascha admissibla da prancepi angal aint igl tetg. Ena montascha segl tetg a madem nivel dalla surfatscha è lubeida per l'installaziun d'en indrez solar posteriour, vot deir, schi succedan nignas ulteriouras maseiras da construcziun sen la cuvreida digl tetg.

Dulzar or indrezs solars

Igl dulzar or collectours solars e cellas solaras è lubia da prancepi angal sen tetgs plats u sen bietgs pitschens ed annexs cun ena schleta invista.

Indrezs solars dulzos or dastgan surpassar la surfatscha digl tetg per maximal 1.00m. Pinavant ston igls indrezs scher ainfra en anghel da 45°, misiro davent digl our digl tetg.

Plazzamaint digls indrezs solars (cf. recumondaziuns da furmaziun aint igl manual per indrezs solars)

Igl plazzamaint digls indrezs solars stò esser adatto an sia furma allas parts existentas dalla construcziun segl tetg scu er alla structuraziun digl bietg. Indrezs solars on da furmar tant scu pussebel surfatschas coerentas e cumpactas.

Indrezs solars ve da fatschedas ed indrezs solars sulets

Indrezs solars ve da fatschedas scu er indrezs solars sulets èn lubias exepziunalmaintg, exclus ainten las zonas da protecziun e da bietgs protegeas, schi:

- a. exista nigra pussebladad tgi fò senn per en plazzamaint segl tetg
- b. igl indrez sa catta betg dalla vart cunter la veia
- c. igls indrezs ve dallas fatschedas vignan montos parallel cun la fatscheda u vignan integros bagn ve d'ena balustrada
- d. indrezs sulets èn adattos alla furmaziun digl taragn ed integros bagn aint igl conturn
- e. cunterfon betg ad interess publics

Per tals indrezs ègl an mintga cass d'aveir ena concessiun.

Relaschea dalla suprastanza communal an sia seduta digls 14 da fanadour 2014.

Igl mastral:

Igl canzlist:

.....

.....

Patric Vincenz

Beat Jenal

